

ASTE SANTUA

JAUNAREN NEKALDIKO ERRAMU IGANDEA (A)

I. ERRAMUEN BEDEINKAPENA ETA PROZESIOA

Oharpena

Senide maiteok: Garizumako aldi honetan, bihotzak prestatzen aritu gara penitentziaz eta maitasun egintzez. Hurbil dugu Pazko jaia. Eliza guztiarekin batean bildu gara gaur, Jaunaren Pazko misterioari hasiera emateko. Misterio hori, Jesu Kristoren nekaldia eta piztuera dira. Misterio hori betetzeko sartu zen Jesus Jauna Jerusalemgo hiri santuan. Beraz, gu salbatzeko egin zuen sarrera horren oroipena ospa dezagun fedez eta maitasunez, eta jarrai diezaiozun eta lagundu gure Jaunari, Haren gurutzean bat eginda, Haren piztuera eta bizian ere bat egin dezagun.

Bedeinkapen-otoitza

Egin dezagun otoitz.
Jainko ahalguztidun betierekoa,
bedeinka itzazu + erramu adar hauek;
eta egizu, Kristo gure Erregeri
goraka eta kantari jarraitzen diogunok,
Beronen bidez betiko Jerusalem irits gaitezela.
Errege bizi baita gizaldi eta gizaldietan.
R/. Amen.

Jaunaren Jerusalemgo sarrerako ebanjelioa

Bedeinkatua, Jaunaren izenean datorrena!

Jesu Kristoren Ebanjelioa San Mateoren liburutik: 21, 1-11

Jerusalena hurbildu eta Oliamendi ondoan Betfagera iritsi zirenean, Jesusek bere bi ikasle bidali zituen, esanez: «Zoazte aurreko auzo horretara, eta berehala aurkituko duzue asto bat lotuta, bere umearekin; askatu eta ekarzikidazue. Inork ezer esaten badizue, erantzun: "Jaunak behar ditu eta berehala itzuliko dizkizu"».

Guzti hau gertatu zen profetak esana bete zedin:

«Esaiozue Siongo alabari:
"Horra non datorkizun zeure erregea
apal-apal, asto gainean eserita,
asto zamari baten umearen gainean"».

Joan ziren ikasleak eta egin zuten Jesusek agindu ziena; ekarri zituzten astoa eta astakumea, eta beren estalkiz txalmatu zituztenean, gainean jarri zen Jesus. Jendetzak bere soingainekoak bidean zabaltzen zizkion; beste batzuek zuhaitz adarrak ebaki eta bidean botatzen zituzten; eta aurretik eta ondoren zihoazenek honela zioten oihuka:

«Hosanna Dabiden Semeari!
Bedeinkatua, Jaunaren izenean datorrena!
Hosanna Goigoikoari!»

Jesus Jerusalemen sartu zelarik, herri guztiak harriturik galdetzen zuen: «Nor dugu Hau?» Berarekin zetorren jendeak, berriz, honela zioen: «Hau Jesus profeta da, Galileako nazaretarra».

II. EUKARISTIA

Mezako otoitza

Jainko ahalguztidun betierekoa,
gizon-emakume guztiei apaltasun bidea erakusteko,
gure Salbatzailea gizon egitea
eta gurutzean hiltzea nahi izan zenuen;
iguzu, arren,
Haren nekaldiko irakaspenak gogoan har ditzagula,
Harekin batera piztu gaitzen.
Zure Seme Jesu Kristo.

I. IRAKURGAIA: Is 50, 4-7

*Ez diet aurpegia saihestu irainei,
eta badakit ez naizela lotsagarri gertatuko.*

Isaias Profetaren liburutik

Ikasi baten mihia eman dit nire Jaunak,
hitz bizkorgarria eman diezaiedan nekatuei;
belarria esnatzen dit goizero,
ikasiek bezala entzun dezadan.
Jaunak belarria ireki dit,
eta nik ez diot gogorrik egin; ez dut atzera egin.
Bizkarra ipini diet, jotzen nindutenei;
masaila, bizarretik tiraka ari zitzaizkidanei.
Ez diet aurpegia saihestu irainei eta listuei.
Nire Jauna nuen laguntzaile;
horregatik ez nintzen lotsatu;
horregatik ipini nuen aurpegia, harri gogor bezala;
eta badakit ez naizela lotsagarri gertatuko.

ERANTZUN SALMOA: Sal 21, 8-9. 17-18a. 19-20. 23-24

**R/. Ene Jainko, ene Jainko,
zergatik utzi nauzu eskutik?**

Ikusten nautenak honela ari zaizkit barreka,
ezpain-keinu eta buru-eraginka:
«Jaunagan du uste on, salba beza;
maite badu, onik atera beza.» R/.

Zakur-taldeak nauka inguraturik,
gaizkile-sailak erdian harturik.

Esku-oinak zulatu dizkirate,
hezur guztiak bat-bana ditzaket. R/.

Nire jantziak berentzat banatzen dituzte,
nire soinekoa txotx egiten dute.
Zu, ordea, Jauna, ez egon urrun,
Zu, nire indar, zatozkit azkar nire lagun. R/.

Neure senideei zure izena diet iragarriko,
batzarraren erdian zaitut goretsiko:
«Goretsazue Jauna, beldur diozuenok,
Jakoben seme-alaba guztiok, ospa ezazue,
izan Haren beldur, Israelen seme-alaba guztiok.» R/.

II. IRAKURGAIA: Flp 2, 6-11

*Apaldu egin zuen bere burua,
horregatik Jainkoak goratu egin zuen.*

San Paulo Apostoluak Filipotarrei

Kristo Jesusek, Jainkoaren izaera bereko izanik,
ez zion gogor eutsi Jainkoarekin berdin izateari;
bestela baizik, bereaz hustu egin zen,
morroi izaera hartuz,
eta beste edozein bezala azalduz.
Eta gizon bezala agerturik,
apaldu egin zuen bere burua,
menpeko eginez heriotzaraino,
gurutzeko heriotzaraino.
Horregatik Jainkoak goratu egin zuen,
eta izen guztien gaineko izena eman zion,
Jesusen izenera belaun guztiak makur daitezen,
zeruan, lurrean eta lurpean,
eta mihi guztiek aitortu dezaten:
Jesu Kristo, Jauna da, Aita Jainkoaren aintzarako.

EBANJELIOA: Mt 26, 14–27, 66

Ebanjelio aurreko txatela: Ik. Flp 2, 8-9

V/. Kristo gugatik menpeko egin zen heriotzaraino,
gurutzeko heriotzaraino.
Horregatik Jainkoak goratu egin zuen,
eta izen guztien gaineko izena eman zion.

Laburdurak, elkarrizketa moduan irakurri nahi denerako jartzen dira: + = Jesus; C =
«Cronista» deritzana; S = «Sinagoga» eta beste elkarrizketa lagunak.

Jesu Kristo gure Jaunaren Nekaldia San Mateoren liburutik

Zer emango didazue, Hori eskuratzen badizuet?

C Aldi hartan, [Hamabietako batek, Judas Iskariote zeritzanak, apaiz nagusietara joan eta esan zien:

S «Zer emango didazue, Hori eskuratzen badizuet?»

C Haiek hogeitamar zilar diru agindu zizkioten.

Judas, orduz gero, Jesus haiei eskuetara emateko egokiera bila zebilen.

Non prestatzea nahi duzu Pazko afaria?

Ogi Hilan lehenbiziko egunean, etorri ziren ikasleak Jesusengana, eta esan zioten:

S «Non prestatzea nahi duzu Pazko afaria?»

C Jesusek erantzun zien:

+ «Zoazte herrira horrelakorengana, eta esaiozue: "Honela dio Maisuak: hurbil da nire ordua; zure etxean ospatuko dut Pazkoa neure ikasleekin"».

C Ikasleek Jesusek esan beza]a egin zuten, eta prestatu zuten Pazko afaria.

Zuetako batek saldu egingo nau.

Ilunabarrean, mahaian zegoen Jesus Hamabiekin. Eta jaten ari zirela, honela esan zien:

+ «Benetan diotsuet: zuetako batek saldu egingo nau».

C Ikasleak, atsekabez beterik, galdezka hasi zitzaizkion banaka:

S «Ni al naiz, Jauna?»

C Hark erantzun:

+ «Nirekin aspil berean ogia busti duenak, horrek salduko nau. Gizonaren Semea badoa, Hartaz idatzirik dagoen bezala; baina zoritxarrekoa, Gizonaren Semea saltzen duena! Gizon horrek hobe zukeen jaio ez balitz».

C Orduan, Judasek —salduko zuenak— galdetu zion:

S «Ni al naiz, Maisu?»

C Eta Jesusek:

+ «Zeuk esan duzu».

Hau nire gorputza da. Hau nire odola da.

C Jaten ari zirela, Jesusek ogia hartu, eta bedeinkapen otoitza eginez, zatitu zuen eta bere ikasleei eman zien, esanez:

+ «Hartzazue, jan: hau nire gorputza da».

C Eta edalontzi bat harturik eta esker otoitza eginez, eman zien, esanez:

+ «Edan guztiok honetatik: hau nire odola da eta, itunaren odola, guztientzat bekatuak barkatzeko isurtzen dena. Hara Nik esan: ez dut gehiago ardorik edango, ardo berria zuekin neure Aitaren erreinuan edango dudana egunera arte».

C Abestu zituzten salmoak, eta Oliamendira atera ziren.

*Joko dut artzaina,
eta sakabanatuko dira artaldeko ardiak.*

Orduan honela mintzatu zitzairen Jesus:

+ «Gau honetan zuek guztiok erorbide izango nauzue; idatzirik baitago: "Joko dut artzaina, eta sakabanatuko dira artaldeko ardiak". Baina Ni piztu ondoren, aurretik joango natzaizue Galileara».

C Orduan, Pedrok esan zion:

S «Beste guztiak erortzen badira ere Zuregatik, ni ez naiz behinere eroriko».

C Jesusek erantzun zion:

+ «Egiaz esaten dizut: gau honetan bertan, oilarrak jo baino lehen, zuk hiru aldiz ukatuko nauzu».

C Pedrok esan zion:

S «Zurekin hil behar badut ere, ez zaitut ukatuko».

C Gauza bera esaten zuten ikasle guztiek.

Nahigabetzen hasi zen eta larritzen.

Orduan, joan zen Jesus bere ikasleekin Getsemani deritzan baratzera, eta esan zien:

+ «Eser zaitezte zuek hemen, Ni hara otoitzera noan bitartean».

C Eta Pedro eta Zebedeoren bi semeak Berekin hartuz, nahigabetzen hasi zen eta larritzen.

Orduan, esan zion:

+ Nahigabez hiltzeko zorian nago; geldi zaitezte hemen; eta egon erne Nirekin batean».

C Joan zen aurreraxeago eta, ahuspez erorita, honela egiten zuen otoitz:

+ «Ene Aita, bihoa, ahal bada, kaliza hau Niregandik. Baina ez bedi gerta Nik nahi bezala, Zuk nahi bezala baizik».

C Etorri zen bere ikasleengana, eta lotan aurkitu zituen. Eta honela esan zion Pedrori:

+ Beraz, ezin egon erne ordu bete Nirekin? Zaudete erne eta egin otoitz, tentaldian eror ez zaitezten; gogoia bizkorra da; haragia, ordea, makala».

C Joan zen bigarren aldiz, eta berriz ere honela egin zuen otoitz:

+ «Ene Aita, kaliza hau ezin igaro badaiteke Nik edan gabe, egin bedi zure nahia».

C Etorri zen berriz, eta lotan aurkitu zituen; begiak logale baitzituzten. Haiiek utzita, joan zen berriro eta hirugarren aldiz lehengo hitzak berak esanez egin zuen otoitz. Gero ikasleengana etorrira, esan zion:

+ Orain egizue lo, eta hartu atsedeen. Hara, iritsi da ordua eta Gizonaren Semea bekatarien esku utzia izango da. Jaiki zaitezte, eta goazen! Hurbil da Ni saltzen nauena».

Eskuak erantsi zizkieten Jesusi, eta lotu egin zuten.

C Oraindik hizketan ari zela, han azaldu zen Judas, Hamabietako bat, eta harekin batean jendetza haundia, apaiz nagusiek eta herriko zaharrek bidalita, ezpatak eta makilak eskuetan zituztela. Saltzaileak ezaupide hau emana zion:

S «Nik musu ematen diodana, hura da; lotu ezazue».

C Berehala Jesusengana hurbildu eta esan zion:

S «Agur, Maisu!»

C Eta musu eman zion. Baina Jesusek esan zion:

+ «Adiskide, zertara zatoz?»

C Orduan, hurbildu ziren Jesusengana, eskuak erantsi zizkieten eta lotu egin zuten. Jesusekin zegoen batek, eskua luzatuz, ezpata zorrotik atera eta apaiz nagusiaren morroi bat jo zuen, eta belarria moztu zion. Jesusek esan zion:

+ «Sar ezazu ezpata bere lekuan; ezpata darabilena, ezpataz hilko da. Zer uste duzu? Nik ezin diodala neure Aitari laguntzarik eskatu? Hark hamabi aingeru talde eta gehiago ipiniko lituzke nire esku. Baina honela ez litzateke beteko Liburu Santuak gertatu beharra dela dioena».

C Orduan, Jesus honela mintzatu zitzaion jendeari:

+ «Lapur batengana bezala etorri zarete, ezpata eta makilekin, Ni harrapatzera. Egunero esertzen nintzen jauretxean erakusten, eta ez ninduzuen bahitu».

C Guzti hau, Profetek esandakoa bete zedin gertatu zen. Orduan, Hura bakarrik utzita, ikasle guztiek ihes egin zuten.

*Ikusiko duzue Gizonaren Semea,
Ahalguztidunaren eskuin aldean jartzen.*

Jesus hartu zutenek, Kaifasenera, apaiz nagusiaren etxera, eraman zuten, han baitzeuden batzarrean bilduta idazlariak eta herriko zaharrak. Pedrok, urrutitik, apaiz nagusiaren jauregiraino jarraitu zion eta, barrura sarturik, morroien artean eseri zen, guzti hura zertan bukatzen ote zen jakin nahiz.

Apaiz nagusiak eta Batzarre osoa Jesusen kontra gezurrezko testigutza baten bila zebiltzan, Hura heriotzara eramateko; baina ez zuten aurkitzen, gezurrezko hainbeste testigu etorrita ere. Etorri ziren azkenik bi testigu, eta honela mintzatu ziren:

S «Honek esan zuen: "Jainkoaren jauretxea xeha dezaket, eta hiru egun barru berriro eraiki"».

C Zutitu zen orduan apaiz nagusia, eta esan zion:

S «Ez al diozu ezer erantzun behar? Zer da, horiek Zuretzat dioten hori?»

C Baina Jesus isilik zegoen. Orduan apaiz nagusiak esan zion:

S «Jaungoiko biziaren izenean diotsut; esaguzu: Zu al zara Mesias, Jaungoikoaren Semea?»

C Eta Jesusek:

+ «Zerorrek esan duzu. Gehiago diotsut: oraintxetik ikusiko duzue Gizonaren Semea Ahalguztidunaren eskuin aldean jartzen eta zeruko hodei gainean etortzen».

C Orduan apaiz nagusiak urratu zituen soinekoak, esanez:

S «Biraoa esan du. Ba al dugu beste testiguren beharrik? Entzun duzue biraoa. Zer deritzazue?»

C Eta guztiak orduan:

S «Heriotza merezi du».

C Eta orduan aurpegira listua botatzen hasi zitzaizkion, eta ukabilka; beste batzuek, berriz, masailekoak emanez, honela esaten zioten:

S «Egizak profetarena, Mesias; asmazak: nork jo hau?»

*Zin eginez ukatu zuen:
«Nik ez dut ezagutzen gizon hori!»*

C Pedro atarian zegoen eserita; etorri zen neskame bat, eta esan zion:

S «Zu ere Galileako Horrekin ibiltzen zinen».

C Pedrok guztien aurrean ukatu zuen:

S «Ez dakit zer diozun».

C Kanpoko atera zihoala, ikusi zuen beste neskame batek, eta honela esan zien ingurukoei:

S «Hau Nazaretoko Jesusekin ibiltzen zen».

C Hark, zin eginez, berriz ere ukatu zuen:

S «Nik ez dut ezagutzen gizon hori!»

C Handik laster, etorri zitzaizkion inguruan zeudenak, eta esan zioten:

S «Inondik ere, zu horietakoa zara; hizkeran ezagun duzu».

C Orduan Pedrok, madarikatuz eta zin eginez, honela zioen:

S «Nik ez dut ezagutzen gizon hori!»

C Eta berehala jo zuen oilarrak. Pedrori Jesusek esana gogoratu zitzaion: "Oilarrak jo baino lehen, zuk hiru aldiz ukatuko nauzu". Eta kanpora aterata, negarrari eman zion saminki.

Pilato agintariarengana eraman zuten Jesus.

Eguna argitu zuenean, apaiz nagusi guztiak eta herriko zaharrak batzarrean bildu ziren Jesusen aurka, heriotzara eramateko. Eta, loturik, Pilato agintariarengana eraman zuten, eta haren esku utzi.

Ez da zilegi hau atabakara botatzea, odol saria da eta.

Orduan, Jesus galdua zela ikusirik, damutu zitzaion Judas saltzaileari, eta hogeitamar diruak apaiz nagusi eta herriko zaharrei itzuliz, honela esan zien:

S «Bekatu egin dut, errugabe Hau hiltzeko salduz».

C Baina haiek erantzun zioten:

S «Eta guri zer? Hor ikus zeuk!»

C Diruak jauretxean bota zituen, eta atera zen handik; eta, joanda, bere burua urkatu zuen. Apaizek, dirua hartuta, esan zuten:

S «Ez da zilegi hau atakabara botatzea, odol saria da eta».

C Eta, elkarrekin mintzatu ondoren, Eltzegilearen Soroa erosi zuten, atzerritarren hilerritarako. Horregatik, gaur oraindik, soro hari «Odol Soro» deritza. Honela bete zen, Jeremias profetak idatzitakoa: «Hogeitamar zilar diru hartu zituzten, Israelgo semeek salgai zegoenari jarritako balioa; eta haiekin Eltzegilearen Soroa erosi zuten, niri Jaunak agindu zidan bezala.»]

Zu judutarren erregea al zara?

Jesus agintariarengana eraman zuten; eta agintariak honela galdetu zion:

S «Zu judutarren errege al zara?»

C Jesusek erantzun:

+ «Zerorrek diozu».

C Eta apaiz nagusiak eta herriko zaharrak salatu eta salatu ari izanik ere, Jesusek ez zuen hitzik erantzuten. Orduan Pilatok esan zion:

S «Ez al duzu entzuten zenbat salakuntza egiten duten zuretzat?»

C Jesusek galdera bakar bati ere ez baitzion erantzunik ematen, agintaria zeharo harrtua zegoen. Preso bat askatzeko ohitura zuen agintariak Festaburuan, herriak berak nahi zuena. Espetxean bazeukan garai hartan hots haundiko preso bat, Barrabas zeritzana. Herria bildu zenean, Pilatok galdetu zion:

S «Nor nahi duzue askatzea ? Barrabas, ala Jesus, Mesias diotena?»

C Bai baitzekien bekaitzez ekarri ziotela. Eta epai aulkian eseririk zegoela, bere emazteak albiste hau bidali zion:

S «Ez zaitez sar gizon zintzo Horrekin; amets ilunak egin ditut bart hori dela eta».

C Baina apaiz nagusiek eta herriko zaharrek berotu zuten herria, Barrabas askatu eta Jesus hil zezala eskatzeko. Agintariak galdetu zion:

S «Bi hauetatik nor nahi duzue askatzea?»

C Herriak erantzun:

S «Barrabas».

C Eta Pilatok:

S «Eta zer egin behar dut, Mesias dioten Jesus honekin?»

C Eta herriak:

S «Josi gurutzean!»

C Pilatok:

S «Zer oker egin du, bada?»

C Herriak, gero eta deiadar haundiagoz:

S «Josi gurutzean!»

C Pilatok, dena alperrik zela eta matxinada ganean zuela ikusirik, ura hartu eta, herriaren aurrean eskuak garbituz, esan zien:

S «Errugabe naiz ni odol honetan. Hor ikusi zeuk!»

C Herri guztiak orduan:

S «Betor geure gain eta geure umeen gain Horren odola!»

C Orduan Barrabas askatu zion; eta Jesus, zigortu ondoren, haien e

josteko.

Agur, judutarren errege!

Agintariaren gudariak auzitegira eraman zuten Jesus, eta gudari talde osoa bildu zuten Haren inguruan; erantzi zizkioten soinekoak, eta estalki gorria jantzi zioten; arantzazko koroa egin zuten gero, eta buruan ezarri zioten, eta kainabera makila eskuinean. Eta aurrean belaunikaturik, iseka egiten zioten, esanez:

S «Agur, judutarren errege!»

C Gero listua botatzen hasi zitzaizkion; eta kainabera kenduta, harekin buruan jotzen zuten. Isekak bukatutakoan, kendu zioten estalkia, bere soinekoak jantzi, eta gurutzean jostera eraman zuten.

Harekin batean bi gaizkile josi zituzten gurutzean.

Ateratzean, Simon izeneko zirenear gizon bat topatu zuten, eta gurutzea eramatera behartu. Golgota –hau da: Buruhezurtegi– deritzan lekura iritsi zirenean, behazunez nahastutako ardoa eman zioten edateko; Jesusek dastatu zuen, baina ez zuen edan nahi izan. Gurutzean josi zutenean, txotx egin zuten, Haren jantziak zer norentzat, eta lurtean eserita Hura zaintzen gelditu ziren.

Buru gainean idazkun bat ipini zioten, hoben ageri bezala: HAU JESUS DA, JUDUTARREN ERREGEA. Harekin batean bi gaizkile josi zituzten gurutzean: bata eskuinetan, eta bestea ezkerretan.

Jaungoikoaren Seme baldin bahaiz, jaitsi hadi gurutzetik!

Handik igarotzen zirenek iseka egiten zioten, buruari eraginez eta esanez:

S «Jauretxea xehatu eta hiru egun barru berriro eraikitzen huen horrek, salbazak heure burua! Jaungoikoaren Seme baldin bahaiz, jaitsi hadi gurutzetik!»

C Era berean apaiz nagusiek, idazlariek eta herriko zaharrek ere burla egiten zioten, esanez:

S «Besteak, bai, salbatu Horrek; eta bere burua ezin salbatu! Israelgo errege, noski! Jaitsi dadila orain gurutzetik, eta sinetsiko diogu. Jaungoikoarengan izan du bere uste ona; Jaungoikoak egiaz maite badu, aska dezala orain; ez zuen, bada, Jaungoikoaren Seme zela esaten?»

C Harekin gurutzean josirik zeuden bi gaizkileek ere, berdin iseka egiten zioten.

Eli, Eli, lema sabaktani.

Eguerditik arratsalde erdira arte, lurralde hura guztia ilunbetan gelditu zen. Eta arratsalde erdi aldera, Jesusek oihu haundi bat egin zuen:

+ «Eli, Eli, lema sabaktani»,

C –hau da:

+ «Ene Jainko, ene Jainko, zergatik utzi nauzu eskutik?»–.

C Inguruan zeuden batzuek, hori entzutean, honela zioten:

S «Eliasi deika ari da Hau».

C Haietako batek, lasterka joan eta ozpinetan bustitako belaki bat hartu zuen eta, kainabera-muturrean lotuta, edateko eman zion. Besteek honela zioten:

S «Utziok; ikus dezagun, ea etortzen zaion Elias, gurutzetik salbatzera».

C Eta Jesusek beste deiadar haundi bat eginez, azken arnasa eman zuen.

Hemen, belauniko jarri eta egonalditxo bat egingo da.

Orduan jauretxeko oihala erdibi egin zen, goitik beheraino; lurrikara izan zen, harriak erdibitu, hilobiak ireki eta hildako santuen gorputz asko piztu ziren. Hauek, Jesus piztu ondoren, beren hilobietatik atera eta hiri santura etorri ziren, eta askori agertu zitzaizkion. Jesus zaintzen zegoen gudari ehuntariak eta bere mutilak, lurrikara eta gertatu zena ikusi zutenean, ikaratu ziren, eta honela zioten:

S «Hau, benetan, Jainkoaren Semea zen».

[C Bazeuden han, urrutitik begira, emakume asko, Galileatik Jesusi jarraituz etorriak, Hura zerbitzatu nahiz; haien artean, Maria Magdalena, Santiagoren eta Joseren ama Maria, eta Zebedeoren semeen ama.

*Josek beretzat zulatutako hilobi berrian
ipini zuen Jesusen gorpua.*

Ilunabarrean, Jose zeritzan Arimateako gizon aberats bat etorri zen; bera ere Jesusen ikasleetakoa. Hark, Pilatorengana joan eta Jesusen gorpua eskatu zion. Eta Pilatok emateko agindu zien. Hartu zuen Josek Jesusen gorpua eta, izara garbi batean bildu ondoren, beretzat harkaitz bizian zulatutako hilobi berrian ipini zuen; ezarri zuen hilobiko sarreran harri biribil haundi bat, eta joan egin zen. Maria Magdalena eta beste Maria han zeuden hilobiaren aurrez aurre eserita.

*Hor dituzue zaintzaileak;
zoazte zeuok, eta zaindu dakizuen eran.*

Biharamun goizean, Prestaera Eguna igaro ondoren, apaiz nagusiak eta farisearrak elkarrekin joan ziren Pilatorengana, esanez:

S «Jauna, oroitu gara, gezur saltzaile Hark, oraindik bizi zela, nola esan zuen: "Hirugarren egunean piztuko naiz". Agindu ezazu, beraz, hilobia zaintzeko hirugarren egunera arte, Haren ikasleak, etorrira, gorpua ostu ez dezaten, eta herriari esan: "Piztu da hilen artetik". Azken gezurra lehenbizikoa baino okerragoa izango bailitzateke».

C Pilatok erantzun:

S «Hor dituzue zaintzaileak; zoazte zeuok, eta zaindu dakizuen eran».

C Joan ziren haiek, silatu zuten harria, eta zaintzaileen esku jarri zuten hilobia.]

Oparigaien gainekoa

Jainko Jauna,
zure Semearen nekaldiari esker
betorkigu laster zure barkamena;
eta ospakizun honetan gaurkotzen dugun
Jesu Kristoren opari bakar honen bidez,
emaguzu zeure errukia,
gure bekatuek merezi ez badute ere.
Jesu Kristo.

Prefazioa: Errugabearen nekaldia errudunon alde

V/. Jauna zuekin.

R/. **Eta zure espirituarekin.**

V/. Gora bihotzak.

R/. **Jaunagan dauzkagu.**

V/. Eskerrak Jaungoiko gure Jaunari.

R/. **Egoki da eta zuzen.**

Egoki da, bai, eta zuzen
 nonnahi eta beti Zuri eskerrak ematea,
 Jauna, Aita guztiz santu,
 Jaungoiko ahalguztidun betiereko Horri,
 Jesu Kristo gure Jaunaren bitartez.

Berak, bekatugabea izanik,
 bekatariengatik onartu zuen nekaldia,
 eta errugabea izan arren,
 errudun bezala izan zen epaitua.
 Bere heriotzaz garbitu ditu gure bekatuak,
 eta bere piztueraz irabazi digu santu izatea.

Horregatik, guk ere, aingeru eta santu guztiekin batean,
 goresten zaitugu, Jauna,
 poz betean [esanez] kantari:

Santu, Santu, Santua...

Jaunartze ondorengoa

Zure misterio santuez indarberriturik,
 otoizka gaituzu, Jauna:
 zure Semearen heriotzari esker,
 itxaroten ditugu geure sinesmenak agintzen dizkigunak;
 egizu, beraz, Haren piztueraz irits ditzagula.
 Jesu Kristo.